

ANUNCIO EN EL PORTAL WEB DEL AYUNTAMIENTO DE LA CONSULTA PÚBLICA

CONSULTA PÚBLICA PREVIA Á APROBACIÓN DA ORDENANZA MUNICIPAL PARA A PROTECCIÓN E CONSERVACIÓN DOS CAMIÑOS E VÍAS PÚBLICAS MUNICIPAIS EN RELACIÓN COAS OPERACIÓNS DE SACA DE MADEIRA.

De conformidade co previsto no artigo 133.1 da Lei 39/2015 de 1 de outubro, do procedemento administrativo común das Administracións Públicas co obxectivo de mellorar a participación dos cidadáns no procedemento de elaboración das normas, con carácter previo á elaboración do proxecto de Ordenanza municipal non fiscal para a protección e conservación dos camiños e vías públicas, con motivo da execución de cortas, depósito, carga e transporte de madeira no termo municipal de Silleda, solicítase a opinión dos suxeitos e das organizacións máis representativas potencialmente afectados pola futura norma acerca de:

- a) Os problemas que se pretenden solucionar coa iniciativa: protexer o viario público por actividades que debido á súa intensidade e incidencia no seu uso poidan supor unha ameaza ao seu bo estado de conservación.
- b) Necesidade e oportunidade da súa aprobación: esta ordenanza fundaméntase no uso das competencias que lle atribúe ao Concello os artigos 4.1 a) , 25.2.d) e 84 da Lei 7/1985, de 2 de abril, reguladora das bases do réxime local; os artigos 6.1 a) , 80.2 d) e 286 e seguintes da Lei 5/1997 de 22 de xullo, de administración local de Galicia; e os artigos 3.1 e 74 e seguintes



do Real Decreto 1372/1986, de 13 de xullo, polo que se aproba o regulamento de bens das Corporacións Locais.

Así mesmo para a aplicación desta ordenanza mediante a presentación dunha comunicación previa fundaméntase nos artigos 4 da Lei 40/2015 de 1 de outubro, do réxime xurídico das administracións públicas e 69 da Lei 39/2015 de 1 de outubro, do procedemento administrativo común das administracións públicas e nos artigos 84.c), 84 bis e 84.ter da Lei 7/1985 de 2 de abril, reguladora das bases de réxime local.

- c) Os obxectivos da norma: garantir a preservación do medio ambiente e a conservación dos camiños e pistas rurais do termo municipal de Silleda, como consecuencia dos danos que poidan ocasionar como consecuencia das operacións de corta, depósito, carga e transporte de madeira no termo municipal.
- d) As posibles solucións alternativas reguladoras e non reguladoras: non existen.

Os cidadáns, organizacións e asociacións que así o consideren poden facer chegar as súas opinións sobre os aspectos expostos durante o prazo de dez días (a contar dende o día seguinte ao de publicación do presente anuncio na web municipal (<https://silleda.es/>), e na sede electrónica municipal (<http://silleda.sedelectronica.gal>), mediante a súa presentación en calquera dos lugares indicados no artigo 16 da Lei 39/2015, de 1 de outubro, do procedemento administrativo común das administracións públicas.

Silleda, na data da sinatura electrónica.

O alcalde,

Concello de Silleda

Rúa do Trasdeza, 55, Silleda. 36540 (Pontevedra). Tfno. 986580000. Fax: 986581021



Manuel Cuiña Fernández



PROPOSTA DE ORDENANZA MUNICIPAL PARA A PROTECCIÓN E CONSERVACIÓN DOS CAMIÑOS E VÍAS PÚBLICAS MUNICIPAIS EN RELACIÓN COAS OPERACIÓNS DE SACA DE MADEIRA.

EXPOSICIÓN DE MOTIVOS.

A presente ordenanza ten como finalidade primordial a de velar pola debida conservación dos camiños e vías públicas municipais, en relación cos danos e desperfectos que poden sufrir os mesmos, como consecuencia das operacións de saca de madeira, comprendéndose dentro desta tanto as operacións preparatorias da corta da madeira como as posteriores. Resulta tamén prioritario o interese en protexer as persoas, vivendas e outras edificacións nos supostos de incendios forestais; e para elo é esencial que as vías de acceso ás zonas forestais se atopen sempre en perfecto estado. O uso dos camiños e vías públicas municipais en condicións óptimas é un dereito de toda a comunidade de usuarios, e esixe dunha intervención administrativa que regule as condicións nas que se deben de realizar as operacións de saca de madeira nos montes e parcelas do Concello, tanto públicos como privados, xa que son por todos coñecidos os importantes danos e desperfectos que ás veces ocasionan estas actividades nos nosos camiños. Trátase, en definitiva, con esta ordenanza, de facer compatible a actividade de aproveitamento forestal coa preservación do medio natural, a protección paisaxística, a conservación dos camiños e a seguridade vial.

Artigo 1. Obxecto.

A presente ordenanza ten por obxecto a protección e conservación dos camiños e vías públicas municipais fronte os danos e desperfectos que poden sufrir os mesmos como consecuencia das sacas de madeira que se produzan dentro do termo municipal de SILLEDA.

Artigo 2. Fundamento.

A regulamentación por medio da presente ordenanza das operacións de saca de madeira fundaméntase no uso das competencias que lle atribúen ao Concello os artigos 25.2.d) e 84 da Lei 7/1985, do 2 de abril, reguladora das bases do réxime local; os artigos 6, 80.2.d) e 286 e seguintes da Lei 5/1997, do 22 de xullo, de Administración Local de Galicia; e os artigos 74 e seguintes do R.D. 1372/1986, do 13 de xuño, polo que se aproba o Regulamento de Bens das Corporacións Locais.

Artigo 3. Ámbito de aplicación.

1.- Para os efectos desta ordenanza, enténdese por operacións de saca de madeira a totalidade das que se desenvolvan para a obtención de madeira de tala, tanto as previas á corta de madeira



(desprazamento de vehículos e/ou maquinaria, preparación dos terreos, accesos ás fincas) como as posteriores (preparación, depósito, carga e transporte).

2.- Quedan excluídas do ámbito de aplicación desta ordenanza:

- as talas puntuais de exemplares de árbores illadas
- as podas e refaldes en plantacións forestais
- o clareo de rebrotes de cepa de menos de tres anos
- os traballos de desbroce e limpeza de predios
- as talas que teñan por finalidade os aproveitamentos para uso doméstico, a eliminación dunha situación de perigo para persoas ou bens, ou as que se produzan como consecuencia da enfermidade da especie.

Artigo 4. Comunicación previa.

1.- Para garantir a conservación dos camiños e vías públicas municipais con motivo da execución de operacións de saca de madeira dentro do termo municipal de Silleda, será obrigatorio presentar nas oficinas municipais, con 10 días hábiles de antelación á data prevista para o inicio da súa execución, un escrito de comunicación previa, conforme ao modelo contemplado no Anexo I desta ordenanza, e sen prexuízo da obtención dos permisos e/ou autorizacións sectoriais que, conforme á normativa vixente, sexan necesarios para cortar montes ou terreos forestais.

2.- O escrito de comunicación previa deberá estar asinado polo madeireiro, e nel deberán constar os seguintes datos:

- Datos de identificación do madeireiro e do propietario forestal:
 - Persoa física: nome, apelidos, NIF, enderezo e teléfono.
 - Persoa xurídica: razón social, NIF, enderezo, teléfono, nome, apelidos e NIF do representante da empresa, xunto coa acreditación da representación.
- Datas previstas de inicio e remate dos traballos de saca de madeira.
- Identificación da finca ou monte afectado, lugar e parroquia onde se sitúa.
- Especie de madeira obxecto da corta.
- Toneladas métricas de madeira que se prevén extraer.
- Modelo, matrícula e peso máximo autorizado dos vehículos e maquinaria a empregar nas operacións a desenvolver.
- Lugares previstos para depósito da madeira á espera da súa carga.
- Camiños e vías a empregar nas operacións de saca de madeira.

3.- Xunto co escrito de comunicación previa, deberase aportar a seguinte documentación:

- Fotocopia do NIF do madeireiro.
- No seu caso, fotocopia da solicitude de autorización para aproveitamento madeireiro, ou da notificación, ante o organismo que corresponda, de conformidade co disposto na Lei 7/2012, de 28 de xuño, de montes de Galicia.



- Ficha catastral dos montes e/ou parcelas afectados/as.
- Plano indicativo dos camiños e vías a empregar nas operacións de saca de madeira.
- Plano indicativo das zonas elixidas para depósito da madeira.
- Xustificante do depósito da garantía.
- Copia do seguro de responsabilidade civil.

4.- Poderase facer unha comunicación previa para varios montes e/ou parcelas cando os traballos vaian a realizarse simultaneamente. Neste caso deberán constar na comunicación os seus datos identificativos (conforme ao establecido nos apartados anteriores deste artigo e no Anexo I), incorporando a correspondente ficha catastral.

5.- No caso de que se incumpra a obriga de comunicación previa establecida neste artigo, o Concello poderá suspender os actos de saca de madeira que se estean realizando, e proceder de conformidade co establecido nos apartados 2º e 3º do seguinte artigo.

6.- Unha vez presentada no rexistro xeral do Concello a documentación sinalada nos apartados 2º e 3º deste artigo, e previamente ao inicio dos traballos de saca de madeira, os servizos técnicos municipais ou ben os funcionarios da Policía Local, comprobarán o estado físico dos camiños e vías que vaian ser utilizados, obtendo as fotografías que sexan pertinentes para acreditar a súa realidade física.

7.- O Concello, excepcionalmente, poderá denegar ou limitar o acceso e/ou o depósito por calquera das vías ou zonas indicadas no escrito de comunicación previa, de forma motivada, tendo en conta o seu estado, a resistencia do seu firme, a súa ubicación, a súa utilización na data solicitada para outros fins, ou calquera outra causa xustificada.

Artigo 5. Obrigas.

1.- Son obrigas do madeireiro encargado de realizar as operacións de saca da madeira as seguintes:

- Presentar nas oficinas municipais o escrito de comunicación previa nos termos indicados no artigo anterior.
- Sinalizar os viais situados nas zonas de extracción e depósito da madeira, conforme ao establecido na normativa vixente en materia de tráfico, circulación e seguridade vial.
- Limpar, retirar ou eliminar os residuos procedentes da corta da madeira e das operacións de carga e almacenamento, de xeito que as pistas, camiños ou espazos públicos queden en todo momento no mesmo estado de limpeza e conservación que tiñan antes de levarse a cabo esas operacións. Esta obriga deberá cumprirse todos os días



ao final da xornada de traballo.

- Limpar as superficies dos montes e terreos forestais de xeito que non queden restos ou materiais que poidan constituír risco de incendio.
- Repor ao seu estado anterior as ramplas abertas para facilitar o acceso ás fincas ou montes.
- Responder dos danos e desperfectos ocasionados nos lugares da tala, viais de acceso, instalacións e demais infraestruturas, como consecuencia da realización das actividades de saca de madeira.
- Constituír a garantía a prol do Concello de Silleda conforme o anexo de garantías, conforme ao establecido no artigo 6.

2.- En caso de que o madeireiro incumpra algunha das obrigas contidas no apartado anterior, o Concello requirirao para o seu cumprimento, outorgándolle o prazo que se considere oportuno en cada caso, sen que poda exceder 10 días naturais . Cando o madeireiro non puidera ser identificado, serán responsables do cumprimento desas obrigas os propietarios dos montes e/ou parcelas de que se trate.

3.- O disposto no apartado anterior deste artigo, enténdese sen prexuízo da imposición das sancións que correspondan polos incumprimentos desta ordenanza, conforme ao establecido nos artigos 8 a 12 da mesma.

Artigo 6. Garantía.

1.- Para responder das obrigas establecidas nesta ordenanza o madeireiro deberá depositar garantía a prol do Concello, en efectivo ou mediante aval, segundo se recolle no artigo 96.1 a) e 96.1 b) do Texto Refundido da Lei de Contratos do Sector Público, aprobado por Real Decreto Legislativo 3/2011, de 14 de novembro. O importe da garantía ascenderá as seguintes cantidades segundo as toneladas recollidas:

• Ata 20 Tn	100,00 €
• De 20 Tn A 100 Tn	200,00 €
• De 100 Tn A 300 Tn	500,00 €
• De 300 Tn A 500 Tn	1000,00 €
• De 500 Tn A 700tn	1500,00 €
• De 700 Tn A 900tn	2000,00 €
• A Partir De 1.000 Tn	2500,00 €

2.- O madeireiro deberá depositar a garantía na Tesourería Municipal con carácter previo a presentación da comunicación previa.

3.- O madeireiro poderá depositar tamén unha garantía anual por importe de 3.000 euros que responderá das distintas cortas a realizar



no termo municipal. Neste caso, esta garantía deberase depositar no Concello nos primeiros dez días hábiles do ano. A partir de aí os diferentes traballos iranse comunicando individualmente de conformidade co recollido no artigo 4 desta Ordenanza. Esta garantía global, que se someterá ao réxime establecido no artigo 98 do RDL 3/2011, de 14 de novembro, será única debendo ser revisada e completada no caso de que nalgún dos traballos levados a cabo durante o exercicio fose executada en todo ou en parte.

4.- No caso de que se incumpra a obriga a que se refire o apartado anterior, o Concello poderá suspender os actos de saca de madeira que se estean realizando, e proceder de conformidade co establecido nos apartados 2º e 3º do artigo 5 desta ordenanza. A Policía Local ou a autoridade competente poderá ordenar a inmediata paralización dos traballos e precintado da zona e das pilas de madeira en caso de incumprimento desta ordenanza .

5.- Unha vez rematados os traballos de saca de madeira, a Policía Local deberá emitir un informe, no prazo de 5 días hábiles a contar dende o seguinte ao previsto como data de remate no escrito de comunicación previa, no que se deixe constancia do cumprimento ou incumprimento das obrigas das que a garantía debe responder.

6.- En caso de cumprimento, o Concello devolverá a garantía, previo informe favorable dos Servizos Técnicos Municipais, no que quede constancia que non se causaron danos nin desperfectos nas vías e infraestruturas públicas municipais, e de que as pistas, camiños ou espazos públicos utilizados se atopan en perfecto estado de conservación e limpeza unha vez rematados os traballos.

7.- En caso de incumprimento, o Concello procederá de conformidade co establecido nos apartados 2º e 3º do artigo 5 desta ordenanza. Transcorrido o prazo outorgado no requirimento, si este foi atendido, o Concello devolverá a garantía, previo informe favorable dos Servizos Técnicos Municipais. Transcorrido ese prazo sen que se de cumprimento ao requirimento, o Concello acordará a realización dos traballos que sexan necesarios, a costa do obrigado, sobre o importe da garantía depositada.

8.- Cando as cantidades depositadas en concepto de garantía resulten insuficientes para sufragar os traballos mencionados no parágrafo anterior, recadarase a diferenza en concepto de ingreso de dereito público.

9.- O disposto no apartado 7º deste artigo, enténdese sen prexuízo da imposición das sancións que correspondan polo incumprimento desta ordenanza.



Artigo 7. Prohibicións.

O madeireiro encargado de realizar as operacións de saca da madeira deberá respectar as seguintes prohibicións:

- Iniciar os traballos de tala sen contar cos permisos e/ou autorizacións sectoriais correspondentes.
- Usar as vías públicas para almacén ou depósito da madeira. Os depósitos de rolla, ramas ou podalla, non poderán invadir as zonas de circulación de vehículos e persoas, nin menoscabar as infraestruturas anexas aos viais, nin supoñer un risco para os usuarios da vía.
- Efectuar desprazamentos de terra que polas súas características deban ser considerados como movementos de terra.

Artigo 8. Infraccións.

1.- Constitúen infraccións a esta ordenanza as accións ou omisións tipificadas como moi graves, graves e leves, de conformidade co disposto nos apartados 2º, 3º e 4º deste artigo.

2.- Son infraccións moi graves:

- a) Realizar calquera das actividades relacionadas coa saca de madeira sen o previo depósito da garantía no importe que corresponda.
- b) Iniciar os traballos sen presentar o escrito de comunicación previa a que se refire o artigo 4.2 desta ordenanza, unha vez requirido polo Concello e dentro do prazo establecido no requirimento.
- c) Iniciar os traballos sen achegar xunto coa comunicación previa, a documentación sinalada no artigo 4.3 desta ordenanza, unha vez requirido polo Concello e dentro do prazo establecido no requirimento.
- d) Non realizar os traballos necesarios para que as infraestruturas, pistas, camiños e/ou espazos públicos municipais utilizados se manteñan en perfecto estado de conservación e limpeza unha vez rematados os traballos, unha vez requirido polo Concello e dentro do prazo establecido no requirimento.
- e) Ocultar ou falsear calquera dos datos a que se refire o artigo 4.2 desta ordenanza.
- f) Ocultar ou falsear a documentación relacionada no artigo 4.3 desta ordenanza.
- g) Realizar os traballos de saca de madeira usando infraestruturas, pistas, camiños e/ou espazos públicos municipais respecto dos cales se tivese denegado por parte do Concello a súa utilización, de conformidade co disposto no artigo 4.7.
- h) Deixar as vías públicas municipais nun estado que supoña unha situación de risco para a seguridade vial, segundo o informe municipal que se emita.
- i) A comisión, nun prazo dun ano, de dúas faltas graves que sexan firmes na vía administrativa.

3. Son infraccións graves:

a) Non presentar o escrito de comunicación previa xunto coa documentación preceptiva (aínda que se achegue despois de ser requirido polo Concello)

b) Deixar as vías municipais en deficiente estado, segundo o informe municipal que se emita.

c) Non demoler ou non repor ao seu estado orixinal as ramplas ou accesos que se construíron ou abriron para entrar nos terreos.

d) A comisión, nun prazo dun ano, de dúas faltas leves, que sexan firmes na vía administrativa.

3.- Constitúe infracción leve calquera outro incumprimento dos requisitos, obrigas e/ou prohibicións establecidas nesta ordenanza, e que non estea cualificada como moi grave ou grave.

4.- Na valoración da gravidade das infraccións teranse en conta a existencia de intencionalidade, a natureza dos prexuízos causados, a reiteración dos feitos, a capacidade económica do infractor e a intensidade dos danos causados ás vías públicas e/ou aos usuarios das mesmas.

Artigo 9. Responsables.

1.- Serán responsables das infraccións sinaladas no artigo anterior as persoas físicas e xurídicas que as cometan en calidade de madeireiros.

2.- Os propietarios dos montes e/ou parcelas serán responsables das infraccións de que se trate no suposto de non identificar aos madeireiros, unha vez sexan requiridos polo Concello, e transcorrido o prazo de dez días hábiles a contar dende o seguinte ao da recepción do requirimento.

Artigo 10. Sancións.

1.- As infraccións desta ordenanza serán sancionadas coas seguintes multas:

- Infraccións leves: multa de ata 300,00 euros.

- Infraccións graves: multa de contía comprendida entre 300,01 euros e 1.000,00 euros.

- Faltas moi graves: multa de contía comprendida entre 1.000,01 euros e 3.000,00 euros.

2.- Na gradación das sancións deberase gardar a axeitada adecuación entre a gravidade da infracción cometida e a sanción aplicada.

3.- A imposición das sancións que procedan non eximirá aos responsables de realizar os traballos de limpeza que sexan necesarios, da reparación dos danos causados e de indemnizar polos prexuízos e perdas a que houberse lugar.

Artigo 11. Órganos competentes.

1.- Será órgano competente para iniciar o procedemento sancionador o alcalde ou concelleiro en quen delegue.



2.- A función instrutora exercerase pola autoridade ou funcionario que designe o órgano competente para a incoación do procedemento, sen que poida recaer en quen tivera competencia para resolver o mesmo.

3.- Será órgano competente para resolver o procedemento sancionador o alcalde do Concello.

Artigo 12. Procedemento sancionador.

A imposición das sancións requirirá a tramitación do correspondente procedemento, de conformidade co disposto na Lei 39/2015, de 1 de outubro, do procedemento administrativo común das Administracións Públicas, e no Real Decreto 1398/1993, de 4 de agosto, polo que se regula o procedemento para o exercicio da potestade sancionadora.

DISPOSICIÓNS FINAIS.

Primeira.- Habilítase á Alcaldía para ditar as disposicións ou instrucións que resulten necesarias para a interpretación, desenvolvemento e aplicación da presente ordenanza.

Segunda.- En cumprimento do disposto no artigo 70.2 da Lei 7/1985, de 2 de abril, reguladora das bases de réxime local, a presente ordenanza entrará en vigor unha vez que se publique o seu texto integramente no Boletín Oficial da Provincia e transcorra o prazo de quince días hábiles previsto no artigo 65.2 do citado texto legal

Silleda, na data da sinatura electrónica.
O Alcalde,

Manuel Cuíña Fernández



ANEXO I COMUNICACIÓN PREVIA

1º.- DATOS DO MADEREIRO

NOME E APELIDOS/RAZÓN SOCIAL

ENDEREZO: _____ NIF: _____
CP _____ CONCELLO: _____
PROVINCIA: _____
Teléfono: _____ Tlf.móbil: _____ Fax: _____
Correoelectrónico/email _____ REP
RESENTANTE / APODERADO (Para persoas
xurídicas) _____ NIF _____

2º.- DATOS DE IDENTIFICACIÓN DO PROPIETARIO DO MONTE OU PARCELA AFECTADO

NOME _____ E _____ APELIDOS/RAZÓN
SOCIAL _____
NIF: _____ ENDEREZO: _____
CP _____ CONCELLO: _____

Concello de Silleda



PROVINCIA: _____ Teléfono: _____
 _____ Teléfono móbil: _____
 Fax: _____ Correo
 electrónico/e-mail: _____

3º.- DATOS DE IDENTIFICACIÓN DO MONTE OU PARCELA AFECTADO

NOME _____ REF.CATASTRA
 L _____ LUGAR/PARROQUIA _____
 _____ SUPERFICIE(M2) _____

ESPECIE	DE	MADEIRA	TN	A
EXTRAER	_____	_____	_____	DE
MADEIRA	_____	TN	_____	A
EXTRAER	_____	_____	_____	DE
MADEIRA	_____	TN	_____	A
EXTRAER	_____	_____	_____	DE
MADEIRA	_____	TN	_____	A
EXTRAER	_____	SUPERFICIE TOTAL A TALAR (M2)		_____
_____ TN TOTALES A EXTRAER			_____	_____

4º.- OUTROS DATOS DE INTERESE

DATAS PREVISTAS PARA COMEZAR OS TRABALLOS DE SACA DE MADEIRA _____
 DATAS PREVISTAS PARA REMATAR OS TRABALLOS DE SACA DE MADEIRA _____
 DATOS DE IDENTIFICACIÓN DOS VEHÍCULOS E/OU MAQUINARIA A EMPREGAR: VEHÍCULO/MAQUINARIA MODELO MATRÍCULA
 PMA _____
 LUGARES PREVISTOS PARA DEPÓSITO DA MADEIRA _____
 CAMIÑOS E VÍAS A EMPREGAR NOS TRABALLOS DE SACA DE MADEIRA _____

5º.- DOCUMENTACIÓN QUE SE ACHEGA:

- Fotocopia do NIF do madeireiro.
- No seu caso, fotocopia da solicitude de autorización para aproveitamento madeireiro, ou da notificación, ante o organismo que corresponda, de conformidade co disposto na Lei 7/2012, de 28 de xuño, de montes de Galicia.
- Ficha catastral dos montes e/ou parcelas afectados/as.
- Plano indicativo dos camiños e vías a empregar.
- Plano indicativo das zonas elixidas para depósito da madeira.
- Xustificante da constitución da garantía.
- Copia do seguro de responsabilidade civil.





Silleda , de de
O MADEREIRO

Asdo:

AO ALCALDE DO CONCELLO DE SILLEDA

Concello de Silleda

Rúa do Trasdeza, 55, Silleda. 36540 (Pontevedra). Tfno. 986580000. Fax: 986581021



Cód. Validación: 6E9F0L3CYPJM0ZDLWCY2SE4Z | Verificación: <https://silleda.sedelectronica.gal/>
Documento firmado electrónicamente desde la plataforma esPublico Gestión | Páxina 11 de 11